

國粹叢書第二集

鄭 鄭
荊山清雋集
所南百二十圖詩
合刻

國學保存會印行



上海图书馆藏书



A541 212 0007 1642B

三山鄭菊山先生清雋集序 雋粗堯切

儒有古君子之風始可以曰儒儒非正於文章之謂文章者所以發揚其實詣而著見於實理也豈可空有其名哉鄭菊山先生蓋抱其實而當其名者在昔林慮齋周伯弼行輩當時人物林林焉如龍虎不可測如鳳凰不可覩非有以自植立於天地間何以與諸公相參錯照耀一世豪傑之耳目耶曩聞先兄秋堂先生望曰先生人物昂然氣節挺然議古喻今無不的當惜不見用於時然所言皆正大所守甚清苦其古君子歟早年遊京師即有聲晚年嘗主安定和靜二書院講明道學學者益尊敬後註易將脫稿而逝頗多雜著文章有詩曰倦遊稿今山村仇君摭四十首曰清雋集遂冠於所南翁一百二十圖詩之首庶幾知有所本橋梓輝映抑亦俱有光焉菊山先生諱起字叔起福州連江透鄉人慶元

已未生景定壬戌卒葬於吳中甌山所南翁名思肖字億翁併序
及之大德五年後學鄱陽道約柴志道序

先君菊山翁家傳

鄭思肖

思肖心數生平所爲不孝一事最深理久當殛死非自損抑語蓋實有罪感造物赦之開其自新之路今雖大哭殞命不足贖一身罪不足述先人德尙忍言哉鄭姓得於周宣王母弟桓公受封之後至晉永嘉分派入閩居於連江東導村今十數世矣高祖上字秀下

字曾祖上字昭左世襲以讀書傳家先君兄弟二人伯氏

蚤喪先君字叔起號菊山名與字之下字同早年嘗名正東方之卦生於慶元己未終於景定壬戌壽六十四歲先君四十歲始生思肖今所記者惟先君五十歲以後事前乎此時正當早年豪傑時奇氣偉節未芻可以形容父子間禮甚嚴非親見事不敢問又無伯叔長兄教之今前輩或有能道其早氣豪邁者特髣髴爾獨憶思肖七歲時親歷之事淳祐丁未前丞相鄭清之以侍讀入朝

泊於湧金門外朝廷忽除之再相先人聞除命下痛哭流涕謂我自上流歸聞端平出師復兩京之敗皆鄭相誤國罪卽登其門歷歷數之厲聲大罵曰端平敗相何堪再壞天下耶竟爲鄭相執下天府母妹思肖俱遭執去當時士氣頗盛京尹趙與憲越一宿俱縱之鄭相乃命天府廣布耳目吏卒於長橋所居左右密物色至於朋友往來出處云爲排日錄聞天府堅求瑕疵欲以他罪加焉如是二年莫能得毫髮鄭相去國事乃寢鄰人始言其布置欲陷人以罪之事先人爲社稷生靈憂蹈此危機有司求之二年不得其過可以見平日大節目矣在京師居時屋後有淫祠因先母病隣人謂宜禱之先人以爲狄仁傑嘗毀江南淫祠一千七百獨畱禹廟泰伯廟伍子胥廟程子尙謂伍子胥廟亦不當畱先人竟手毀廟像後亦無他每事正直無邪諂率皆是讀書之外唯好飲

酒嗜食茶他皆不切切焉客京華三十餘年不行狹邪徑竄之門
屈其氣節世俗通賄賂事一毫未嘗破戒四方餽以禮唯正則受
有酒卽飲朋友有錢卽與朋友聞人之善昌言之見人之惡面折
之意氣飛動不協於時人固敬之抑且畏之或頗忌之平生獨冠
巍巾異於衆議論氣象出處言動皆正直嚴毅有法度當時宰執
賢其賢欲官焉恥出私門之恩終拂其事每與平章賈似道論得
失累忤其意後竟爲彼所疎凡公卿大夫交言不及利語不阿媚
卒無親昵黨比之交其實清則藐視一時人物寄心澹泊以道自
鳴高潔其行白首六經家不蓄銀器不蓄直錢之貨不喜翫圖畫
骨董不親博奕不言私事惟家藏古今書數千卷自庚辰出閩遊
京師庚子於潛縣請主於潛學時居渡子橋作三膜記甲辰伏闕
言姦相史嵩之奉旨免解丙午上江陵丁未遷居西湖長橋扁其

廬曰水南半隱作水南半隱記壬子伏闕言水火災不報漕臺請
爲諸暨縣主學蕭山縣主學甲寅絜居吳門浙西倉臺請爲尹和
靜書院堂長淮東闕請爲泰州胡安定書院山長平江府請爲三
高堂長無錫縣率請至邑庠開講環轍淮左浙右據坐臯比深衣
竹笏講性理學一時學者翕從焉講道來歸故廬小圃植幽花修
竹逍遙其閒意不欲復出將閉門養道遂其閒適天不壽以年不
得終此高隱計早年場屋不利卽潛心窮理盡性之學極有所得
至老讀書不倦晚年造詣益深正欲毀舊太極無極說別作太極
書病已亟矣將易箴際盡歷歷言得失且命思肖至中年加以學
力削改補釋足成易註我丁未年後卽畱心注易今十六年汝勿
廢我生前志汝終身所行之道平日語汝久矣遂卒先人素自許
以治國平天下之道制於命而不伸痛哉使其生至今日決不忍

陷於賊阱必一死盡臣子報國之節著述有講義詩集雜著前後
讀書愚見太極無極說修攘事鑑南北要覽深衣書鄉飲酒書并
注易六十卦外又有碑銘記序百五十餘篇詩百餘篇皆晚年所
作亂後故稿爲賊取去僅存於別稿者文得十一篇詩得十五篇
餘篇不可復得深爲痛惜先人生子女二人思肖長焉女弟適人
不諧終願爲尼修淨業思肖又懦弱無能爲一絲文脈終將何如
近日漳州大義甚正干戈擾擾閩閩正苦吾族在鄉甚盛誰歿誰
存今俱可傷墳墓纍纍盡埋沒荆榛戰血中獨先祖墓在江陵城
外先人早失怙恃寄食外氏亦莫知地之詳先人丙午遊江陵嘗
望祭焉先人墓在姑蘇甌山西隴亂後幸無恙先母兵火閒丙子
歲茶毗水化骨殖矣天長地久北風淒寒如我不似於人啟人掩
口胡盧大笑者誠不可掩矣又痛思無子紹先人遺書剝割心髓

雖念念謀爲傳後計但國事大變奚敢獨以家事論今爲國爲家之念紛然茫然裂碎其心莫措手足仰天大慟莫喻後之所云

三山鄭菊先生清雋集

所南翁一百
二十圖詩附

山村仇遠仁近選

順德鄧實校錄

爛柯山

春風萬古洞門開
塵世興亡是幾回
碁局至今無處覓
樵人於此遇仙來
飛梁橫跨丹虹影
絕頂平鋪白玉堆
天下紛紛無好著
斜陽下嶺共徘徊

卜居

久欲謀歸力不任
浮雲蹤跡謾巢林
功名未入屠龍手
貧賤常懷買鶴心
月下開門微雨過
樓頭聞笛二更深
世間萬事俱陳迹
空倚西風閱古今

自黃山還途中作

屈指還京十日程每逢歌處問村名春沙脉脉溪初漲夜雨垂垂
曉又晴山下有人傳虎出店中炊飯見牛鳴天涯行客無寧日不
及田家業在耕

謁岳王墳

我來拜謁岳王墳松柏蒼蒼上宿雲臣子報君終一死權姦賣國
欲中分鷹揚當日誰能及鴈叫中原不可聞石馬石人山寂寂英
雄於此憶將軍

次照晦巖韻

便騎老虎不須鞍忍辱仙人出宰官入內講經千佛現跣趺對御
六龍寒指頭有月娑羅冷舌上懸河海水乾聖主賜衣漫大地西
方國土未爲寬

再登南樓

客中重上倚層臺天闊雲收八面開鴈帶岳陽秋曉過浪涵巴峽
影西來諸營種柳今何在老子登樓得幾回自是江山雄壯處興
亡不必問寒灰

思耕

江湖漸老身山澤本來心經濟不敢問耕耘猶可尋一頃半頃許
三更二更深親朋相接近雞酒開塵襟

登荆南城樓

因爲古荆州翻成一段愁孟嘉曾落帽王粲此登樓唐鄧通襄路
沱潛並漢流太平官府盛昔日欠來遊

宿虎丘

到晚歸不去因而此宿休雲深千古寺月冷一天秋崖裂池如束
天虛塔欲浮最宜初日上高處看烟收

宿洞霄山中

入山時八月嵐氣似深冬巖洞生風雨窠巢落檜松山中九重鎖
月下一聲鐘警省非人世今秋得異逢

喜靜

素來嫌僻靜今漸與相安師友凋零盡年時出處難春風雙屐暖
夜雨一燈寒洙泗曾顏輩何曾作好官

餘杭界早發

早發促程期籃輿帶月低山中如白晝斗下渡清溪群動霜初落
四鄰雞未啼惟聞兵遞鋪星急過淮西

餘杭道上

五年茲路上頻往又頻還歲月孤松老風霜苦竹斑溪流天目水
雲出洞霄山馬上因閒眺蜉蝣宇宙間

病後

漸懶說功名修真喜道經淒涼秋聽雨空闕夜觀星有病色先見
無心夢最靈堦前風葉響還又感飄零

歸去好

歸去豈不好平田帶淺林春猿鳴雪澗晴日上雲岑世久無鳴櫓
時當學展禽吾生今老矣梁甫豈能吟

送友人之淮

積得讀書身從教此道貧逢秋爲遠客知己是何人天下方多事
西風至不仁但於登眺處杯酒莫辭頻

吳江三高祠堂

吾拜三高堂三堂在何許香爐上蒼苔破屋落天雨石澗水彈痕
地洞龍潛處清魂汗漫游芳名垂萬古

吳江太湖龍王殿

吾謁龍王殿龍王在何許太湖三萬頃水族龍爲主離離明月宮
渺渺寒烟渚天下有旱蝗吾亦能行雨

荆南別賈制書東歸

來時秋雨滿江樓歸日春風度客舟回首荆南天一首月明吹笛
下揚州

送友人之鄂

湖海聲名落搢紳由江而鄂溯鱗鱗煩君黃鶴樓頭看天下英雄
有幾人

晚春卽事

輕寒時節牡丹開葉底青青又見梅門外數枝楊柳薄一春鶯燕
不曾來

荆江口望見君山

荆江江口望漫漫一白無邊夕照寒只是青雲浮水上教人錯認
作山看

繁昌江邊見兩獺祭魚人立而拜

寒食清明在客途片帆漂泊老無廬松楸方念無人掃忽見江邊
獺祭魚

虎丘尹和靜書院示開講

和靜書堂八面開新分半席在山隈若無人聽都歸去傳語生公
借石來

爲九華王此山賦寧石

我謂此山天作石石不是石人不識千年野鶴獨見君石上採芝
石上喫

關山月

霜下月色白沙飛
月色黃征人此暴露
未有不辛傷
滿野髑髏骨
依山魚雁行
祁連與瀚海
慘淡更蒼茫

赤壁歌

赤壁山赤壁水
江有蛟龍野有蛇
虺天蒼蒼雲茫茫
周瑜於此走
曹操聲名萬古隨
風長

君乘黃

君乘黃臣乘青
二乘先後如流星
君乘黃金漆照鏡
臣乘青竹織
作樵道逢相揖
失恭敬君乃傴僂
莊其形世人多認
車與笠交道
如此今猶馨

天高高

天高高兮色青青
夜沉沉兮星熒熒
不知余命所繫兮
何星

採桑歌

晴採桑雨採桑田頭陌上家家忙去年養蠶十分熟蚕姑只着麻衣裳

樵歌三首

上山劬山山丁登下山嵌山山稜層秋殘日暮歸來晚茅簷洗脚月又明明朝早入芙蓉城

入城不識公與卿行歌道上旁無人衣衫籃縷鶉百結與妻索笑妻生嗔那知不是朱買臣

山坳築着牧牛兒白石鑿鑿蒙茸披繆公無人甯戚死獨吹薜栗誰得知不如採樵同路歸

讀馮道傳

西山有薇二子採之二子竟死薇不療飢匪惡周菽食不下咽君

臣義重彼蒼者天爾道何人數主一身有何顏面冠冕搢紳喬固
諸賢寧死道邊曹操不帝清議凜然

短歌行

覽鏡摩娑歲月蹉跎道長命窄憂慮如何何以消除非酒莫祛醉
來不見醒復如初跼蹐鏘鏘孔孟皇皇何非何是孰劣孰強日出
杲兮月出皓兮無風無雨可以同携人生朝露保不及暮青青壘
壘皆是墳墓天机轉深轉勞用心不如坦蕩驅遣光陰

飲馬長城窟

飲馬長城窟下見征人骨長城窟雖深見骨不見心誰知征人心
怨殺秦至今北邊風打山草地荒漫漫五月方見青七月霜便寒
古井無井飲資帶糧盡乾自從征人掘此窟戍馬飲之如飛翰朝
呷一口水暮破千重關秦皇極是無道理長城萬里誰能比

鄂州南樓

淳祐六年冬十月我來獨自上南樓曉霧江山都不見霧收日出
城東頭照見漢陽樹照見鸚鵡洲浪濤江漢出岷峽洞庭雲夢天
共流大船如龍捲寒碧小船如葉飛洪溝費禕霞珮跨黃鵠洞賓
玉笛橫清秋沈寥突兀不可狀開闔風雨晴烟浮空中一一都照
見照見今來古徃絲粟無限愁夜郎逐客心膽大醉欲搥碎醒又
休此山此水長不老英雄消盡山水留何當大雪夜明月婆娑老
眼看九州春風吹雪變紅綠牛羊被野邊無憂

洞庭君山辭

時附戍蜀船行

山爲君兮水爲臣水爲臣弓象爲兵君有定位兮兵無定形知山
知水兮知君臣之性情不知師不知比兮又奚知用兵之精余經
山之外兮覩山水之杳冥佳氣葱鬱兮或天香而龍腥烟雲變化

兮或狗狀而人形風濤洶湧兮或崖立而天平或夕陽兮漁歌或
曉霜兮鐘聲或雪下兮雁叫或夜半兮鼉鳴或仙人張樂兮霞珮
之駢駢或神丁從駕兮車騎之麟麟冬寒春暖兮湖草幾番之青
青今來古往兮人物幾代之廢興嗟余行役兮顧髣髴之星星無
由登山臨水兮與鷗鷺盟北風吹袂兮又將之荆徘徊不忍去兮
聊以歌而行

辭吊富沙梨山大王祠

唐詩人李頻也

梨山之陽兮有廟煌煌州人祭享兮驪酒樵羊王之未死兮守土
此方王之既死兮州人不忘建山之峭兮建水之長建杭之粲兮
建茗之香州人禱福兮王錫吉祥魂之來歆兮雲旗央央蛇虎遁
伏兮松桂芬芳梨花燁燁兮王之甘棠自古詩人兮憔悴異常王
之爵位兮何嗇於唐昔駕五馬兮今衣袞裳詩人之窮兮詩人之

昌

招魂醉翁賓陽

君之在世帝勅下君之謝世帝勅回魂之爲變性原返氣之爲物
情本開於戲龍兮鳳兮神氣盛噫嘻鬼兮歸兮大塊埃身可朽名
不可朽骨可灰神不可灰采石捉月李白非醉耒陽避水子美非
災長孫王吉命不夭玉川長子詩不侂新城羅隱大奇特錢唐潘
闋終崔嵬陰兮魄兮曷徃陽兮魂兮曷來君其歸來故交寥落更
散漫君其歸來帝城絢爛可徘徊君其歸來東西南北不可去兮
君其歸來春秋霜露令人哀花之明吾無與笑葉之隕吾實若摧
曉猿嘯吾聞淚墮宵鶴立吾見心猜玉泉其清可鑒西湖其甘可
杯孤山暖梅香可嗅花翁葬薦菊之隈君其歸來可伴逋仙之梅
去此又奚之哉

刊

行

所南翁一百二十圖詩集自序

昔嘗序湯西樓先生壯遊集云天地之靈氣爲人人之靈氣爲心
心之靈氣爲文文之靈氣爲詩蓋詩者古今天地間之靈物也吾
生也冥頑其不靈於詩不靈於文不靈於心不靈於人也久矣棄
物若然者孤孤枯枯迂迂疎疎是誠不靈不然也以其不然不靈
也凡有求皆不作絕交游絕著作絕倡和漸絕諸絕以了殘妄爾
今或遇圖而作或遇事而作又或者又欲俱圖之胡然乎乃然彼
不然而然恣不絕其絕而絕於不絕以無作作其所不作將欲
靈夫不靈之靈以爲靈其靈靈乎其不靈靈乎此其所以滿目青
山綠水垂笑於無窮無窮無窮也耶

刊

行

所南翁一百二十圖詩集

順德鄧 實校錄

黃帝洞庭張樂圖

天水相涵萬象清
咸池真樂妙無垠
大音豈在九霄外
有意聽時却不聞

堯民擊壤圖

百姓相忘堯帝春
畊田鑿井淡無情
只今正是何年月
日日從東土生

巢父洗耳圖

萬是喧喧雜響中
細參巢父意無窮
須還半掬溪邊水
方始教君耳不聾

許友棄瓢圖

天下搖頭不肯爲恰如瓢掛老松枝許由不在箕山上千古高風
屬阿誰

呂望垂釣圖

八十翁翁心尙孩渭濱癡坐弄徘徊當初若是逃名者誰要文王
上釣求

夷齊西山圖

扣馬癡心諫不休既拚一死百無憂因何留得首陽在只說商家
不說周

老子度關圖

紫氣東來壓萬山老聃吐舌笑開顏青牛車外天風闊搖動當年
函谷關

紀昌貫蝨悟射圖

素來夢覺兩俱空
開眼還如合眼同
蝶是莊周周是蝶
百花無口罵春風

輪扁諫讀書圖

輪扁釋椎開口諫
國君據坐展書開
古人糟粕終枯淡
誰醉天然滋味來

卞和泣玉圖

大璞中函天地精
卞和抱出愈分明
一番別足一番哭
哭殺世人無眼睛

甯戚飯牛圖

斯人豈是飯牛者
浩歎空懷扣角悲
說到漫漫長夜處
南山白石也攢眉

孺子濯纓圖

秋影澄澄湛碧波濯纓人遠意如何臨風歌罷飄然去賣弄滄浪清處多

葉公畫龍圖

神物難傳變化時葉公眼外泄天機一從親見真頭角滿手風雲雷電飛

孟嘗君度關圖

狐白裘邊事若難孟嘗門下亦何顏若無意智翻身去半夜焉能度此關

屈原九歌圖

楚人念念愛清湘苦憶九歌頻斷腸只道此中皆楚國還於何處拜東王

屈原餐菊圖

誰念三閩久陸沉飽霜猶自傲秋深年年吞吐說不得一見黃花一苦心

范蠡扁舟圖

烏喙無情奈若何
功成只合理漁簑
躍身吳越興亡外
一舸江湖風月多

毛遂脫穎圖

十九人中不數君
當機勇辯獨超群
若非末后脫穎出
爭得英風潑楚雲

魯欵器圖

此心安分卽逍遙
無欲何愁外境搖
纔有秋毫失中正
一杯水亦不能消

列子竊鈇圖

宇宙茫茫盡坦途莫將得失自相辜胸中若有一些子大地山河俱竊鈇

秋胡子圖

卽歸猶未到家中艷語勾春妾面紅耐相逢不相識梅花那肯戀東風

西施捧心圖

蕩盡吳王醉後春化爲顰笑艷精神當胸一點痛得別直是妖嬈惱殺人

驪山老姥磨鐵杵欲作繡針圖

欲化龜蛇生聖胎驪山微意孰能猜純鋼一塊都磨盡不信纖毫眼不開

秦女吹簫圖

弄玉飄飄仙女姿
鳳皇低舞久相期
簫中應有別一曲
飛出青天影外吹

湘靈鼓瑟圖

霧質煙姿雪月心
凌波無跡似多情
試聽誰在湘江上
髣髴秋風曲數聲

毛女圖

六國傾城輦入秦
深花密柳鎖青春
神仙自是長生路
豈是阿房宮裏人

徐福探藥圖

仙藥長生不易求
仙山可在海東頭
祖龍滅盡諸侯後
徐福却來嬴一籌

青門種瓜圖

百二山河勢莫當
咸陽誰付與高皇
盡嫌嬴政鮑魚臭
爭慕邵平瓜圃香

漢高祖將韓信圖

先入關中得計多
彭城永是漢山河
不操擒縱英雄手
韓信何由肯倒戈

張子房遇黃石公圖

三度橋邊伺老仙
始將兵法盡相傳
不知躡足此一計
還出書中第幾篇

四皓圖

曄曄紫芝巖石隈
避秦有地似蓬萊
可憐白髮坐不定
又被漢朝呼出來

周亞夫細柳營圖

細柳營中作略殊甯容直入驟先驅不因一見入門訣文帝何曾
識亞夫

李廣射石虎圖

怪石蹲身草莽中錯疑猛虎噴腥風何消重費將軍力只在當頭
一箭功

董仲舒不窺園圖

西漢諸儒君最醇無人見面意應深三年盡力窺經史一旦看花
了古今

蘇武牧羊假寐圖

十九年閒墮渺茫飢來嚙雪齒生香一心只夢飛歸國雙眼何曾
看見羊

蘇李泣別圖

同爲武帝一時人忠逆分違感慨深
早信子卿歸漢去淚痕滴滴
滴黃金

司馬相如題柱圖

初上昇仙何慷慨重來衣錦頗從容
男兒意氣當如此透過禹門
方是龍

張騫乘槎圖

牛女宮中事若何親身曾得上天河
逢人莫說支機石滿洩蒼蒼
意已多

翟公交情圖

翟公冷語久逾新漢世交情古亦今
不被死生貧賤轉此時方始
見人心

朱買臣賣柴圖

年當五十始榮華覆水難收重嘆嗟
豈信後來春色別滿柴擔上
盡開花

二疏東門祖帳圖

昔日賢哉二大夫東門祖帳耀通衢
太平時節獨先去閤國人知
此意無

嚴君平垂簾賣卜圖

多是垂簾自養神僅能了日卽安貧
不離忠孝談玄妙豈是尋常
賣卜人

王初平牧羊圖

兄弟參商四十春金華山裏問斜曛
相逢不是牧羊客白石顛頽
冷笑君

西王母蟠桃宴圖

立圃筵開物外春萬仙歡笑動精神蟠桃種子今猶在誰是三千年後人

嚴子陵垂釣圖

新莽紛紛未有涯桐江山水頗爲嘉無心偶向一絲上釣得清風滿漢家

袁安臥雪圖

飛玉堆寒二丈過杜門僵臥養天和不愁屋外六花大但覺胸中清氣多

高鳳讀書漂麥圖

癖愛詩書苦未休肯將俗事掛心頭等閑痛快語言外那見雨來和麥流

張天師飛昇圖

玉局曾經拜老君子孫今尙實立文要知龍虎山前意但看空中數片雲

王粲覆棊圖

鴉鷺爭飛局局殊便生國手亦難圖未曾落子有一着王粲還能覆得無

先主三顧草廬圖

抱膝高吟梁甫時臥龍致雨未爲遲若無三顧草廬意剖出心肝賣與誰

孔明出師表圖

一身英氣射光芒北定中原事轉長落得兩篇出師表至今只是漢文章

孔明成都八陣圖

孔明抱義恥偏安不道中興事業難賴有石頭知落處任從人換
八門看

王祥剖冰圖

母病杯羹意未諧解衣竟欲臥冰開有心直透清波下安得無魚
躍出來

王衍舉阿堵物圖

口不言錢早不同何須相試苦相攻今朝叱去阿堵物一室玲瓏
分外空

竹林七賢圖

清談何浦晉江山誰與中原了歲寒惟有白雲三四片飛來自向
古琅玕

王子猷看竹圖

秋沁徽之骨亦清翠光如水漾空明只圖一見此君面誰更問人
閑姓名

王子猷訪戴圖

雪夜懷人泛剡溪造門而返是還非不曾相見猶相見滿載清風
獨自歸

阮籍醉眠酒家圖

少婦當壚應怪人陶陶一覺了殘更無情不作如花想夢見醉鄉
生月明

劉伶荷鍤圖

酒國韶光無際涯大人境界絕明儕生來自有一方地何待醉終
纔始埋

戴安道破琴圖

獨抱洋洋太古心
王門何苦欲相尋
狂來寧可破琴去
不許俗人聞此音

畢卓甕間圖

醉玉頹來欲化仙
一窪和氣藹芳妍
終霄自向華胥去
吏部何曾甕下眠

孫康映雪讀書圖

孫康苦志惜居諸
雪夜無燈興有餘
冷地白光生破屋
自然開眼見詩書

張翰思葦鱸圖

名爵雖榮心最苦
葦鱸有味食無厭
後來京洛風塵暗
轉覺吳淞江水甜

孫楚枕流漱石圖

孫楚匆匆誤答時說來頗與事相違枕流漱石翻爲妙活弄胸中
倒一機

庾亮登南樓圖

老子情懷頗滑稽登樓恰喜月明時雖然於此興不淺要且諸人
知不知

周處除三害圖

一朝周處奮英豪三害皆除豈憚勞若是不能降自己縱屠龍虎
不爲高

王羲之蘭亭圖

猶記蘭亭三月三流觴曲水暢清酣分明一段永和意好向羲之
筆外參

桓伊三弄圖

傾蓋相逢不問誰知音那肯露心機一聲吹破清秋影驚散閑雲各自飛

車武子聚螢讀書圖

武子耽書不暫忘練囊終夜照淒涼讀來讀去東方白笑殺流螢數點光

陸績懷橘遺母圖

獨薦霜丸意不安誰供甘旨侍團圓驀然憶着孃生面萬樹黃金盡喜歡

吳隱之飲食泉圖

外物終難換肺腸隱之清介頓生狂便教飲盡貪泉水只覺通身白雪香

郝隆曬腹書圖

七夕庭中羅綺乾鄰家應是鄙儒冠文章滿腹無人識鋪與青天白日看

陶淵明三徑圖

老氣蒼寒松樹活閑情幽淡菊花開一條古路無人走還且與誰相往來

陶淵明對菊圖

彭澤歸來老歲華東籬儘可了生涯誰知秋意凋零後最耐風霜有此花

王孝伯痛飲讀離騷圖

名士天生磊落才只耽痛飲罄樽罍誰傳一味解醒法歌斷離騷眼自開

許真君飛昇圖

鐵柱遺蹤尙儼然五陵後必出羣仙當時謀姆說甚麼四十二人都上天

孫登長嘯圖

碧眼空空照九州阮公不是我同流劃然長嘯誰聽得獨有蘇門山點頭

王烈餐石髓圖

五百年方開此山寒光浮煖濕而乾明明正是洪濛髓只恐凡人不肯餐

桃源園

長城徭役苦咨嗟澧水偷春隱歲華有耳不聞秦漢事眼前日日賞桃花

爛柯圖

日出樵柴日落歸幾年黑白夢紛飛看來直待斧柯爛始悟老仙
碁外機

延平躍劍圖

白晝平津湧似雷盡驚靈物出塵埃倒翻三尺揮空去對舞雙龍
破浪來

陶弘景三層樓聽松風圖

弘景層樓插太清萬龍捲翠響泠泠此心不出三界看一片秋聲
何處聽

文選閣圖

太子奢華能幾年盡將春夢付荒烟錯聽古調一兩拍空嗅斯文
數百篇

唐明皇遊月宮圖

玉仗飛行馭太空須臾徑到廣寒宮
三郎胸次無高見落眼蟾蜍
光影中

李靖天瓢圖

夢裏騎龍出八荒掃空熱惱作清涼
不消數滴天瓢雨淨洗娑婆
透骨香

王勃滕王閣記圖

王勃清才俊不禁爛鋪艷錦賞知音
空餘高閣青雲裏誰識落霞
秋水心

狄仁傑白雲親舍圖

駐馬回頭眺碧空河陽在望去匆匆
吾親雖舍白雲下豈出梁公
一念中

孟浩然歸隱圖

明主憐才若賜官
奔馳微祿負家山
狂吟一首笑歸去
滿路秋光上醉顏

李太白硯靴圖

斗酒未乾詩百篇
篇篇奇氣走雲烟
自從捧硯脫靴後
笑看唐家萬里天

杜子美茅屋爲秋風所破歌圖

雨捲風掀地欲沉
浣花溪路似難尋
數間茅屋苦饒舌
說殺少陵憂國心

杜子美騎驢圖

飯顆山前花正妍
飲愁爲醉弄吟顛
突然騎過草堂去
夢拜杜鵑聲外天

子美孔明廟古柏行圖

諸葛甘棠歲月深霜皮黛色鬱沉沉尙垂清蔭蜀國裏一樹風霜
千載心

韓昌黎祭鰲魚圖

朝奏空言暮遠途籃關飛雪漬衣裾豈期去國八千里此意猶能
化鰲魚

柳子厚賦寒江釣雪圖

空立影外渺孤舟不與漁翁意思侔萬頃風濤一天雪且看誰解
下金鈎

盧同煎茶圖

月團片片吐蒼烟破帽籠頭手自煎七椀不妨都喫了恣開笑口
罵羣仙

陸龜蒙茶竈筆牀圖

笠澤往來無定期煮茶垂釣醉吟詩一船清致終難畫不是散人應不知

公孫大娘舞劍圖

纖手生風攪畫寒好花翻影艷清歡試看不犯鋒銚處舞碎晴空雪一團

張果老倒騎驢圖

云是堯時丙子生狂蹤怪跡恣幽情拗驢面目不須看一任騎來顛倒行

張志和漁父圖

茗雪春深花滿溪一鈎翻動碧琉璃蓑衣簑笠儘有意不到斜風細雨知

藍采和踏踏歌圖

踏踏歌中天地開紅顏春樹莫相催藍袍轉破轉奇特別看仙人
舞一回

鍾呂傳道圖

鍾呂喃喃手指空應談玄牝妙無窮都來造化只半句不在丹經
文字中

呂洞賓賣墨圖

鍊就玄玄一塊金朝磨暮寫愈精神先生此墨初無價不識誰爲
買墨人

沈東老遇呂洞賓圖

東老忘懷相遇時洞賓爛醉以爲期聊題不入毫端句早被石榴
皮得知

巴山橘中圖

剖破渾淪一殼寬，二仙飛去已雲端。須知橘裏封疆別，莫作凡間勝負看。

中秋苦雨趙知微登天柱峰賞月圖

人愛中秋月色同，忽驚涼雨翳昏鐘。如何只隔一重膜，不見仙家天柱峯。

南柯蟻夢圖

忘了堂堂六尺身，鬼花生艷幻微春。絕憐蟻窟無分曉，迷盡古今多少人。

崔護覓水圖

哭斷東風轉有情，俄驚滿面笑容新。當時飲水今猶醉，別是桃花半點春。

倩女離魂圖

有心誰怕鐵爲墻直透虛空未易量若問合離眞僞事滿池綠水笑鴛鴦

崔智韜虎妻圖

佳人睡覺失青山惡毒心腸賣笑顏認得皮毛一歸去花枝無艷虎全斑

玉川長鬚赤脚圖

慣立煎茶屋角頭低眸頻候雪花浮一奴一婢亦作怪不爲先生破屋愁

陳搏睡圖

五季干戈亂似麻慵將醒眼閱年華駒駒一覺華山裏誰問春開幾度花

逋仙探梅圖

雪壓咸平處士家
凍雲鎖暝苦相遮
欲知天上春消息
只覓南枝第一花

蘇東坡前赤壁賦圖

泛舟赤壁痛斲杯
孟德英豪安在哉
何似江山風月妙
不從自己外邊來

李伯時所畫太乙真人蓮葉舟圖

天上真人妙出神
聊乘蓮葉下南冥
若人欲識空涼境
但誦薰風一卷經

無名氏巡簷數脩竹圖

四簷玉立碧重重
冬日相看眼亦空
何啻數來千萬个
不知那個弄清風

刊

行

錦錢餘笑二十四首

或問錦錢者何義曰以錦爲錢雖美觀寔無用也

有時發一笑清于萬壑冰有時吐一語濁于三月春所以天地間不着如是人任之波波走永劫長沉淪

昔有古先生忒殺不啣溜拈得一枝花失却一張口白晝叫不醒徒爾打筋斗若欲了此意但飲一杯酒

晚年闔閭國僑寓陋巷屋屋中無所有事事不具足終不借人口伸舌覓飯喫以此大恣縱罵人笑吃吃

山中一溪水絕與衆水別不解飲清風只解醉明月一片清冷意活動流不徹何勞濯纓人再三苦饒舌

我家南山南日月最相愛清光潑面來只是無人買我昔買得之翻手恣買賣山北諸草木也只得禮拜

佯狂眞佯狂踏碎東風影一任東風吹花意亂不定鬧鬧人叢中
人人喚不應借問老先生莫教是姓鄭

頭戴爛紗巾脚踏破鞋底不知以何道琮琤宇宙裏或恐是達人
毋乃是癡子我亦欲問之面冷似鐵鬼

我有一句子朗朗最分明問水水亦笑問石石亦嗔獨有老枯樹
聞之彌精神從此開笑面惱殺天下人

崛強數十年只弄一枝筆筆是無根花日日常結寔千千萬萬顆
顆顆如紅日日採將來布施十方佛

蒼蠅亦奇哉腹內矢何物黑者變爲白白者變爲黑不換人活眼
何以化流俗我來闔浮提却喜無此術

一火陶鑄來莫不皆完具豈有一造化而勞別父母可憐生盲者
當面不辨主此理甚無數唾汝化爲土

不怕明日死且喜今日活拍響浪敲擊飛謔訛挑撻直送雙眼去
天外破毫末盧都橫上唇口門八寸闊

三三卽九九數之何曾有九九非三三拈來不用參滿頂髮鬢鬢
滿面骨巖巖不知死日至只是弄癡憨

巉巉岩谷中盡謂是白石一見一摩抄老眼滴寒碧絕無一點香
蒼頊直堅立當道橫黃金惜哉無人識

叫笑舞荒唐面上生雪霜一味呵呵笑赤脚走四方明月忽見憎
憎我太枯清我亦罵明月罵月弄光明

每愛入深山最怕石路惡剖樹斫木屐堅欲護雙脚卽忙着將來
步步革落落從教世上人罵我錯錯錯

二十餘年來非不喜飲酒近日青天癡也逐世人走罵詈古冰雪
讚嘆新花柳安得不獨行鼻角插入口

飄飄山中行與雲同出沒飢來餐生石入口細無骨滿吻流甘香
不嚼而味出幽禽獨賞音數聲不可忽

生來好苦吟與天爭意氣自謂李杜生當趨下風避而今吾老矣
無力收鼻涕非惟不成文抑且錯寫字

昔者所讀書皆已束高閣只有自是經今亦俱忘却時乎歌一拍
不知是誰作慎勿錯聽之也且用不著

突然出身來撥却青天轉擊破古洪濛碎作七八片片生春風
散作花柳面面冷眼笑何處不相見

頑絕頑絕以笑爲生業剛道黑如炭誰知白似雪笑殺娑婆兒
盡逐光影滅若無八角眼豈識四方月

叫賣沒底有有價不敢道拾得一塊泥勝如萬塊寶如此至鷲突
直是不老草逢人但點頭好好好好好

何待死方休卽今骨已朽奇特動天地也擲向背後咄這臭矢囊
恣情問大口幾番說得風驚落虛空走

刊

行

上海图书馆藏书



A541 212 0007 1642B

